

四庫全書

集部

欽定四庫全書

南澗甲乙稿卷三

宋 韓元吉 撰

五言律詩

南劍道中

甲子年作

喚渡春潭側  
提轡踏曉晴  
回舟動山影  
映日見魚行  
墅遠孤烟出  
江深白鷺明  
塵勞消底計  
對此覺身輕

步月

山靜水逝響我行清夜中月華霜著地雲影浪搖空有  
酒不惜醉無人誰與同端娥搗仙藥應厭廣寒宮

端午日張園分題

輦路逢端午今年始賜休不知人世暑還有水軒秋花  
氣晴薰坐湖光晚逼舟明朝又奔走贊作片時留

秋日雜詠六首

客少無塵語官閒省吏文醉眠千嶂日危坐一牕雲酒  
戶時通籍詩壇漸策熟平生不龜手郢客渾揮斤

草草重陽節黃花惜未開故人猶有酒行客且銜杯日落蛩聲苦雲低雁影來南山足佳氣獨立意徘徊醉著山堂夢初涼枕簟清秋聲迷夜雨月色誤天明爲客心長憤思親意未平歲華容易晚寂寞壯心驚古郡青山合乘高眼倍寬風驚梧葉陣雨暗菊花團涼色宜欹枕秋光怯凭欄向來疎懶意景物暫相歡怪底西風別秋香一夜繁攢金差可擬揉蠟巧能搏買地宜多種移牀且細看江南蘿菊晚頼爾慰愁端

絕壁跨城樓連天海氣浮長空去鳥盡落日斷雲留鼓  
角深秋壯山河薄暮愁勞生知底所倚杖寄滄洲

聽雨

昨夜燈花暗今晨雨意深殘花惟有葉新筍已成林未  
辨扶頭飲聊為擁鼻吟興闌幽夢斷簷際足清音

豐樂樓

今歲西湖上經行始此迴輕烟認花柳細雨識樓臺春  
半已多日官閒能自來情知欠樽酒倚杖且徘徊

清明

老去驚時節春來念物華青烟百六日同社兩三家醉  
著凌風舸歌成滿路花滄江萬里意獨立送殘霞

閒居遣興

著雨柔柔媚吹風小麥齊江深涵日淨野闊並雲低車  
馬能相問琴書故可攜村村花自好不奈子規啼

道中遇停郊祀詔書

丹詔西來急沿淮次第知應嗟饗帝日郤作視師期士

苦三年戍人懷四郡悲平戎可無策帷幄定誰咨

建業書事

千載西州路何人不此行山橫桃葉渡江動石頭城天  
闕雲端聳秦淮雨後清敢論風景異舉目笑平生

過芙蓉對鏡嶺

世事日千變勞生憂患多誰知度炎熱正爾陟嵯峨峰  
巔蓮初綻崖枯鏡未磨江東茲絕險歎我兩經過

慈雲嶺

登玉京洞遇雨

俗物祇散意市朝那復情未能蓬島去且上玉京行古  
洞深無底幽泉細有聲山靈知我意賸乞片時晴

雨中同鄒德飯白雲菴

小雨不成雪凍雲猶沒山若無官事縛聊傍野僧閒濁  
酒間何闊清遊阻且艱相看成冷淡得句不空還

懶惰已成癖幽尋湖上臺應知千里近動作半年來一  
徑草仍碧兩山梅未開猶憐衝雨濕路入亂雲堆

極目慈雲路看山立少時湖光經雨闊柳色泥煙垂琢  
石觀蹲獸鐫崖讀斷碑西關知底險撫掌笑兒嬉

山行

意遣都忘遠行歌未覺勞崎嶇一徑入上下數峯高嫩  
白憐新菊輕紅訝小桃得桃花數枝歸來清興動風葉亂蕭

騷

秋盡暑猶劇今朝涼意新輕陰能障日小雨不生塵度  
壑時投策看雲一岸巾鄰僧問何往茗菓愧情親

借屋復借竹主人貧可知清風時引酒長日最須棊牆  
缺秋聲過庭空月影隨遙憐對高節幽獨更題詩

龔敦頤芥隱詩

萬古須彌頂嘗于芥子看憐君作書窟喚客築詩壇默  
識眼界淨忘憂心地寬老來同此味廣廈任高寒

僧仲儼芥室

設席纔方丈誰將芥子看須彌藏自穩琥珀拾應難腳  
底芒鞋破顧邁衲被寒遙知八萬座一笑且團樂

龍華寺傅大士真身像

古寺郊丘側鐘魚曉未喧雙林有遺骨瑞萼記名園粒  
石嗟餘飯神楂想叩門蠶桑猶有謁鼓舞動山村

青陽龍池山潮泉其應有時禱于泉上坐頃三應  
山中人以爲未有也

八月錢塘岸江潮晝殷雷豈知驚浪涌不轉此峯來古  
寶深無際神淵祕莫開山靈如愛我三送雪成堆

寄題尹少稷借竹軒

易安齋

紫陌猶千里禪房自一家翠深穿小徑紅濕動迷花絡  
石寒梢亂欹巖碧碧幹斜春江夜來雨如為洗烟霞

過松江寄務觀五首

四海習鑿齒雲間陸士龍酒狂須一石文好自三冬風  
水客愁遠烟花春事濃還將枕流耳來聽景陽鐘  
風浪白如屋垂虹烟靄間清心太湖水滿眼洞庭山放  
鶴迎人舞飛鷗伴我閒是中有佳句詩思未容慳

一別未十日舉頭楊柳黃蜂來知酒美梅度覺船香岸  
幘春容好翻書畫景長無人共談塵自酌引壺觴

湖岸見亭館誰家長鎖門主人寧好事滌水但名園借  
我安茅屋容君共酒尊風波正奔走獨立望江村

並舍盡垂柳出簷多好花獨尋江岸路靜愛野人家水  
暖分魚子沙晴處荻芽放歌吾亦醉漁戶即生涯

寄趙德莊二首

報陟西樞掾遙憐勢未行葬親嘗有請去國豈無名松

菊關心在江山到眼青琵琶洲畔宅歸計幾時成  
早辱交情厚年來事輒同自知榮宦拙甘爲好詩窮鳬  
鴈且依水馬牛還信風故應懷李白但欲老江東

送子雲五首

四海雙兄弟南來幾別離未成春草夢先動白雲思涕  
淚三年隔風塵數月期生涯奔走裏卜筮定何時

薄宦何堪遠兄今奉板輿貓頭供美筭玉板薦嘉魚川  
陵徐行李暄寒慎起居會因回鴈足時一問何如

楚國富山水衡湘千里餘人皆思太傅我獨念三閭貧  
賤真勞矣功名果命歟官閒道林寺洗眼臥看書

別意能淒楚驪駒且緩聽百年三過一萬事醉還醒策  
馬身猶健看山眼倍青東風有底憾吹柳暗長亭

水闊湖南道春深可當遊鳥聲喧綠樹花影逎行舟短  
袖那容舞良疇不易謀有親垂白髮斂板未應羞

送漳赴分寧尉

挾篋度春水絮飛花易闌吾衰聊玩世子壯且勤官雨

後半篠綠風生孤棹寒慙酌雙井爲試茗芽看

送溫伯玉二首

楚尾還重九荒園菊半花因君向姑孰使我墜烏紗更  
度千秋嶺休尋萬里沙壯年豪氣在途路莫興嗟

牛渚青山路衰遲舊往來西風動黃葉朔雪記寒梅戍  
鼓邊城近樓船猛士催然犀不用照拔劍憶澹臺

送張仲良二首

客裏親朋別詩成倍黯然春風動花柳歸路繞雲煙共

絕過門盜

予與仲良俱六女子

俱無使鬼錢生涯知底許消息幸

頻傳

氣概青雲上聲華碧海邊交遊俱得譽伯仲總能贍幕  
府寧淹薄諸公肯薦延功名第遲速強飯且加鞭

送梁士衡歸餘杭

一水分他縣音書近可傳飄零俱北客憔悴各中年破屋  
春風裏扁舟夜雪前故人逢短簿秀實作簿爲話意茫然

古寺荒山曲相遇日自宜插花狂墮幘折屐醉爭慕世

事關情懶風光逐意移歲寒冰斷港君去復何之

送諒弟丞邵陽

春水生南澗吾衰久索居三年還作別數字且頻書文  
史差無負田園慨未餘常存愛民意門戶有權輿

送中甫兄之淮南

憶昔湖陰道邊聲日夜聞遠峯明積雪疊鼓墮層雲未  
歎河山異常憂玉石焚三年真一夢相見且論文

老惜親朋別貧知客寓愁青燈耿遙夜濁酒對窮秋寒

日催征騎新霜倚縣樓因君問淝水莫渡北來舟

流赴貴池簿

四十纔生子今年亦効官國恩期共報世路覺尤難簿  
領猶應暇詩書且細觀傳家門戶立卽此慰衰殘

次韻子雲春日見懷二首

每惜春光去生憎鷓鴣鳴倦遊心易賞多病戍仍更風  
雨山花過池塘野水生買牛歸問舍此計會應成

山寺鶯花裏懸知載酒行青春隨夢斷白髮伴愁生爛

醉真吾事忘機豈世情書來得佳句雙眼暫增明

次韻張晉彥書事

韻利何時縛康居久未灰天威如自震敵勢不難摧日  
月丹心在風塵白眼開受降城旋築且緩羽書來

次韻任信儒見過

鬪雀嗟窮巷鳴鶗枉故人塵埃生破甑風雨塾烏巾別  
父情逾厚詩來語更新囊空得珠玉此段不全貧

次韻趙任卿至北苑二首

行樂湏春事微官日自忙輕雲弄天色細雨出風光筠  
甲連山破林翳夾道蒼擬尋花島去更待茗芽香  
好雨驚連夜疏鐘喜報晨池心春漲綠花面曉粧勻野  
渡經年別官茶幾焙新風光為傳語何事曲江濱

次韻魯如晦雪晴

臘近千門雪風高一夜晴醉餘和被擁夢破覺魄明聾  
鼓三年戍鬪河萬里情應憐鐵甲冷烽火未湏驚

次韻金元鼎新年七十

七十古稀有君今還倦游危機直虎口薄利紙蠅頭黃  
髮宜登用清時忍退休遙知江上宅聊近水邊鷗

論文傾滿座嗜酒見天真舊憶李君馭今懷王翰鄰歡  
情知老大詩話倍清新莫作懸車念滔滔且問津

葉少保挽詞六首

奧學餘家法宏材邁古風刺煩樽俎上禦侮笑談中勲  
業中興殿規模大駕宮公造業行宮考  
周漢制度甚備哀聞父老泣

遺愛六州同

望實諸公右文章百代師匠時存詔令謀國見丞疑易識悲麟意難追吐鳳辭公傳春秋而易未舉門生滿天下誰繼蔡

邕碑伯喈作橋公碑

宦達平生早高年及引歸安車榮絳節黃髮遽衰衣未致生芻奠俄驚薤露啼孝心天地惻相望兩靈幃精舍湖山外天開萬石林五車娛晚歲一壑遂初心激水穿巖竇裁花繞澗陰佳名端不朽揮淚記登臨翰墨通家舊吁嗟大父時追隨千里駕酬唱百篇詩小

器慚非遠孤童誤見奇慇懃授簡意敢負昔年期

公在閩中

作萬象亭某為之賦

憶罷儀曹試登門語更親故懷如昨日一醉賞餘春佳句猶霑墨遺編竟掩塵公欲序高祖文集烟雲變朝暮感慨獨傷神

故資政殿大學士樞密洪公挽詞二首

世學摧東楚文名冠異科弟兄聯玉筍父子擅金坡籌幄淵謀在陪京惠愛多無因奠雞酒清淚灑江波

甲第湖山羨人知小隱名天方開樂土地忽起佳城祕  
殿疏殊渥珍臺錫異榮勲勞纔右府曾未陟魁衡

故贈太師丞相文恭陳公挽詞三首

拱揖消狂寇從容奉兩宮臨危幾謝傅忍事實婁公陶  
治無偏黨經綸盡樸忠再來金鼎地高臥亦成功

扶疾祇嚴詔邦基整屢危紫宸朝奏事黃閣暮興悲德  
望儀千載恩榮冠一時石龜山下路誰為記豐碑

凜凜循良吏休休一个臣投艱推宇量懲悔賴精神給

侍恩雖渥懷歸志莫伸平泉開甲第花木未經春

故太師和王挽詩三首

宿衛登環尹榮恩四十春威名傳翰海功烈上麒麟卻  
敵凝山岳臨機妙鬼神中興奉朝請勞舊總無人

淮右偏師出江津督府開橐臯賊陣威爪步敵鋒摧寶  
劔疇能舉神旗悵莫回悲風蒼水路千載有餘哀

甲第神京冠玉封異姓優風雲開傑閣水月轉芳洲種  
玉階庭盛揮金族緒周諸郎自持橐袞袞尚公侯

致政龍圖給事吳公挽詞二首

風采儀三院循良著六州譽高青瑣闈名動紫雲樓經  
世餘閑議興邦闕遠猷君王問黃髮柱石可能留

勇退湖山地心期白傅論仙風占蒼嶺樂土並桃源壯  
節傳交舊儒科付子孫脩齡纔八十珍瘁只聲吞

致政龍圖給事徐公挽詞二首

磊落南州士家聲二百年失身幾利吻得路已華顛青  
瑣元虛位黃扉久佇賢上欲大用公而不起九原寧可作東望益

潛然

今代詢黃髮臨雍缺盛儀久從曾金樂俄重鯉庭悲德  
履嗟如在功名誤見期平生柱頤劙聊掛墓門枝

葉夢錫丞相挽詞二首

製邑騰嘉譽升平遂一州雍容持從橐慷慨動宸旒相  
業看調鼎兵機久運籌勲庸元未究湖海淚空流  
味道蘓仙井言歸鬢尚青僅周新甲子還仰舊儀刑祀  
殿欣疏寵華鐘待勒銘追隨樽酒地愁絕最高亭

挽任諫議詞二首

身致高門重心無閨室欺臧孫宜有後伯道乃無兒公  
子以族  
子後無千載君如此流年疾若斯寧無百人贖遂作九原悲

凜凜諍臣節恂恂循吏名世嗟陽諫議人憶謝宣城優  
詒纔三接嘉言未一行清霜數行淚豈為故人傾

故端明尚書汪公挽詞二首

未冠登華選高文動漢廷持身嚴築席慮世炳丹青庶

府咨沿革諸儒見典型空嗟廊廟略不上鼎彝銘

獻納高門地君王識履聲閩山歌惠政蜀道憺威名逝  
矣嗟天命誰歟總國成弟兄無六十殄瘁亦堪驚

致政許侍郎挽詞二首

海內循良政高名實吏師銅符嘗五換玉節更三持慷慨

平戎策雍容聖德詩

公嘗獻十二說及詩百韻太上歎賞

甘泉僅持橐

功不負明時

蜀道煩司馬宣城屈謝公風行萬里外身老十年中厚

德今疇繼深知昔誤蒙佳城闕千載難酒恨何窮

故宮使待制侍郎陳公挽詞二首

政譽京江口威名峴首山折衝章貢外制勝漢淮間零落金闈彥淒涼玉筍班文章與功業未老竟長閑

結綬同郎省幽居願卜鄰櫻寧良自適坎壈遂無伸壯志嗟猶在交情晚更親秋風敬亭路西望一霑巾

故宮使參政觀文錢公挽詞二首

忠孝全家法清修極道腴雍容調庶政談笈靖邊隅許

國心猶壯安時貌不枯脩齡纔七十誰為隔黃爐

甲第依香火棲心不離禪頤神雖綠野紀績自凌烟榮

觀丹丘外真遊弱水邊佳城近劉阮覺路有飛仙

故致政參政大資張公挽詞三首

海內推耆德朝端藹直聲金輝餘烈火玉價自連城正色消羣枉高風聳後生君王問黃髮猶僅陟台衡

益部煩分陕金陵起御戎逢時身已病憂國志彌忠廊廟訏謨外丘園夢寐中彈冠與歸老感節有初終

憶荷公車薦多慚識面求驚心異生死倒指十春秋國士懷青眼門生慨白頭東芻嘒老淚東與大江流

挽曾伯充大夫詞二首

作吏餘家法臨民有古風政推平易外人在典型中道擬莊生合公留意  
黃老年幾衛武同清時記者舊揮淚楚江

東

宦達雖無意安榮自一門剖符看令子曳綬及諸孫咸德清難繼高風俗為敦葬車駢百兩歸臥九華根

方務德侍郎挽詞二首

壯歲分符節飛騰四十春吁嗟循吏傳無復老成人三輔勤勞舊西清寵數新青山問何許猶與謝公鄰

上聖詢黃髮清時慨莫留居中二千石典外十三州禁闈多閑議籌帷裕遠猷父親半天下注海淚空流

周元特詹事挽詞二首

道學尊閭里衣冠見偉人雞羣真野鶴麌角自祥麟謙論追前輩清時識諍臣他年激貪懦風動雪溪濱

黃髮趨嚴詔青宮啟太微園公方入侍疏傳已言歸奏  
牘三千在流年七十稀無從奠鷄酒老疾只沾衣

挽徐敦濟郎中詞二首

南渡推人物屢常有世家州麾三上最使節五分華通  
籍恩初渥登車病已加甘泉垂入侍華屋漫興嗟

強學三冬足高談四座傾書成唐北海文似漢西京籌  
幄嘗裨畫星曹僅掛名生芻纔一束聊寄淚縱橫

挽傅安道郎中詞二首

節概存先烈文才藹雋聲弟兄聯軒仕父子擅英名密  
勿棲郎省華光擁使旌甘泉虛從橐曾未席恩榮  
蚤負凌雲氣長懷流水音詞場俱白首世路只丹心妙  
語空成誦懽盟詎可尋泉山幾千里涕淚俱零襟

范泉州挽詞二首

淡墨標名早飛騰僅石渠學傳外家蘊論合古人餘議  
本楓宸疏評和相第書忠言與危行青史未應虛  
玉節江南道銅符海上州登車人自化截鑾士爭留不

作田園計長懷世事憂秋風閉黃壤誰為子孫謀

挽張元幹國錄詞二首

左學馳聲舊中朝得錄初宏材知底用壯志亦成虛歸  
施三千遠親年八十餘蒼天誰與問行路亦欷歔

一第固已晚九遷人共期功名雖有命壽考獨無時門  
士韜珪璧諸郎襲禮詩化年振儒學猶慰九原悲

尹少稷挽詞二首

蚤擅奇童譽中輩處士聲談鋒發粲開闔筆力妙縱橫主

聖由言悟官清以諫名故交零落盡老淚與河傾  
今代賢良策中興未一陳文章如漢士家世亦齊人遇  
合嗟云晚忠嘉慨莫伸朔風吹墓草毀譽付千春

毛平仲挽詞二首

奧學窮千古奇文擅兩都功名一盃酒身世五車書未  
奏揚雄賦長懷仲舉輿溪塘巖下水豈羨石為渠

蚤歲聞嘉譽論交鬢已絲長言雖面隔千里但心期故  
壘生芻蕘塵編幼婦辭倚天長劍在欲掛漫興悲

宋傳道挽詞二首

德履無遺恨絃歌有去思養親三金樂作郡十年遲壯志沈黃壤英遊閉赤墀豐碑頌遺愛誰為繼羅池

留落東州彥相期幸卜鄰筒詩餘唱咏樽酒記情親舊國歸無日諸鄉見有人佳城千載恨雪涕楚江濱

故秦國太夫人鄧氏挽詞

朱藏一丞  
相內子

諸父聯丞弼元夫總化鈞光華人莫並恭儉古無倫沐國三茅土儀家五鳳麟塗車閭里慟矧此故園親

信國太夫人慕容氏挽詞

蔣丞  
相母

望族尚書舊宜家  
藹縉紳無人知  
善教有子冠鴻鈞  
箕箒惟安禮詩書  
不待鄰鳴堂萬鍾  
養風木倍悲辛



南澗甲乙稿卷三

欽定四庫全書

集部

南澗甲乙稿卷六至

詳校官庶吉士臣范逢恩

主事臣呂雲棟覆勘

總校官進士臣程嘉謨

校對官編修臣吳舒惟

謄錄監生臣金際會

欽定四庫全書

南澗甲乙稿卷四

宋 韓元吉 撰

七言律詩

鹿鳴宴

金殿春風策雋賢上林弧矢更爭先不辭老懦聊推轂  
要見飛騰總著鞭勲紫肇端登鳳沼葉公始詔章接武  
侍甘泉侍從諸賢前後多領文字之職明年貢籍還增倍定作東州盛

事傳 東陽解額甚窄主司有遺才之嘆國朝故  
事所解全中南宮則次舉許倍增人數云

立春感懷

南北驅馳老病身不堪節物更催人梅稍白白猶藏臘  
蔬甲青青便作春鐵馬漸欣邊塞靜土牛還祝歲時新  
聖朝文物從茲始元日郊丘得上辛

喜雪

苦寒無那歲嶧嶢一夜陰風雪滿城莫問牛羊迂使節  
卻思鵝鴨溷軍聲庭空賸喜羅琪樹履敝猶堪步玉京

更碾新芽試湯火從來冷淡是書生

元夕再用韻

瑤山直上玉梯橫不用銀花散火城著柳共看飛絮動  
打牕渾作亂蚊聲路尋鸞鶴天疑近石壅鯨鯢觀易京  
便擬乘風跨滄海更須新月趨潮生

春日

霏霏小雨映烟光睡起文書正滿床芍藥倚階纔弄色  
酴醿堆架漸吹香林端好鳥猶相應葉底殘花欲自藏

便覺春風如我老須君駐世有奇方

春日山中

杜陵愛飲覓南鄰我亦顛狂不奈貧漸有好花宜過雨  
應須美酒細酬春十年鄉國無窮思千里江湖未老身  
莫向空中厭愁寂杏梢桃葉一番新

雨後睡起有懷

菊枝萱草亂庭隅旋卷疎簾臥看書枕簟涼生秋雨後  
軒牕睡足晚風初官閒自愛門無轍計拙猶慚食有魚

莫遣功名心易老只應湖海氣難除

夜坐聞牕下水聲

書史懸知伴此生敢求身外百年名青燈又暗吹牕雨  
流水長聞入夜聲玩世久忘榮辱累定交諸盡死生情  
翛然隱几焚香坐不獨心清境亦清

曉霽再用前韻二首

牕外幽花無數生亂紅相映不知名長條自轉風前影  
別壑還添雨後聲閉戶苦無佳客語披書聊慰古人情

詩成步逐山腰月相對茅簷夜色清

新筍成行嫩菊生故人為作小軒名十年敢有旌麾意  
兩部空遺鼓吹聲世事如塵紛過眼風光和酒最關情  
曲肱不作南柯夢槐影陰陰枕簟清

七夕亞之置酒再用前韻

案此詩題云用前韻檢  
七律中無之蓋已佚矣

烏鵲無聲夜向闌空庭插竹巧誰看長生殿裏金釵暖  
百子池邊五縷寒夢破清風吹雨腳醉餘新月上林端  
閒來不辨論時節臘喜秋花共夕餐

九日獨酌

茱萸滿把半青紅  
強擬登臨少客同  
碧樹池塘秋色裏  
黃花時節雨聲中  
官閒覓句能消日  
酒薄看山尚怯風  
高李故人今健否  
一樽懷古意無窮

病中放言五首

松牕永日度涼颸  
坐覺清陰寸寸移  
境靜故應閒可樂  
形羈猶有病相隨  
塵埃末路思千里  
風露何年飽一枝  
百歲窮通吾自了  
閉門長詠子桑詩

長夏空齋冷欲冰幾愁無米澗鄰僧途窮誰為一舉手  
計拙自宜三折肱風靜鶯飛猶跕跕日斜蚊聚已蕭蕭  
此身示疾非吾病臥看南山翠作層

歲月催人易白頭只應蝴蝶夢為周躋躋久悟人間世  
汗漫已期方外遊化鶴自知迷故國斷鼈今見立神州  
蓬萊水淺君須記蓮葉翩翩僅可舟

寓意平生止墨卿轉喉無奈觸錢神敢將名利期當世  
直欲文章似古人積雨尚添門外轍顛風不掃甌間塵

倦游儻有凌雲賦肯為黃金巧致身

少日功名謂立成壯年漂蕩已心驚正平只合依文舉  
元亮何妨慕孔明墓上征西真底用生前杯酒未宜輕  
田園待足何時足歸赴空山猿鶴盟

有童子市龜瓦以百金得而放之

百金為換七玄衣自啓筠籠俯釣磯白水真人聊並聘  
清江使者遂同歸負圖可但逢時出曳尾寧須與世違  
好去滄波莫回首餘不亭下柳依依

記建安大水

孤城雨腳暮雲平不覺魚龍自滿庭托命已甘同木偶

置身端亦似羸餅浮家卻羨鷁夷子弄月常憂太白星

當日乘槎便仙去故人應罪曲江靈

紹興甲子歲予寓建安夏天水舉家

蕩覆騎危僅脫因此作詩自唁乾道癸巳將命過高郵遇社受言猶子鎧錄以見示讀之恍然蓋忘之矣受言時為提舉茶事幕人拯予者也鎧實見之俯仰三十年矣死生契闊不勝慨嘆閏月二十七日書

與蘇訓直約遊招隱寺

十日春晴未放梅籃輿端為看山來路尋絕壑空流水

寺倚蒼巖只廢臺處士尚餘三畝宅野僧合買萬松栽  
故知佳興難為敗上盡西峯眼界開

鼙鼓初歸塞上師京江酒美勝年時春來逆旅真無事  
身到名山合有詩石底於菟窮作穴泉間科斗鬧成池  
荒寒景色君休問後日應懷此客隨

雨中同伯恭至湖上

莫嫌鞭馬踏春泥茶鼎詩囊偶共攜山色雨深看更好  
湖光烟接望還迷連天花絮飛將盡夾道蒲荷長欲齊

官事得閒須洗眼蓬壺只在帝城西

清明日雨中同中甫子雲二兄集湖上

莫辭沖雨濕春衣要看湖山滴翠微絮重欲飛堤柳暗  
花寒無賴海棠稀官忙未覺追遊少醞美猶堪盡醉歸  
屈指薰風來幾日綠荷簪水已依依

清明後一日同諸友湖上值雨

出遊初不計陰晴聊喜湖山信馬行弱柳自隨烟際綠  
幽花還傍雨邊明嫩蒲碧水人家好密竹疎松野寺清

爛醉一春纔幾日可無佳景付詩情

元夔以詩留別用韻示之

密竹疏松一水邊高春自占曲肱眠心如古井真無浪  
跡似寒灰豈復然舌在未應甘寂寞地偏猶可小回旋  
春風又綠池塘草清夢從今只惠連

淵明遼屋樹扶疎大似蓬蒿仲蔚居老矣強營三徑菊  
閒來未厭五車書詩成歎我同招隱賦就須君敵子虛  
努力青雲家世事他年簪筆待嚴徐

清明前一日與客自光孝登般若菴觀鐵塔舊基  
因至鐵獅頂

青鞶藜杖破層雲勝日猶能界眼新窄堵已椎豪士手  
狻猊猶現法王身寺藏松竹疑無地路接烟霄不到塵  
車馬憧憧城市客舉頭相望幾由旬先是山半舊有鐵塔舉子以為不利  
秋試衆手碎之絕頂有鐵獅子相傳郡  
南山為羣狼形故以鐵獅子厭勝之也

夜宿斜溪聞杜鵑

船牕初日弄晴暉起坐胡牀自灑衣無數青山隨岸改

幾聲幽鳥喚人歸  
鷗盟好在重遊戲  
蝶夢驚回果是非  
便擬走書聞稚子  
歸來同買釣魚磯

過武夷

不到仙山二十年  
道人雙鬢亦皤然  
卻看翠嶺千尋石  
又訊清溪九曲船  
目極已高聊自喜  
身輕欲上可無緣  
只應猿鶴遙相認  
笑我歸耕未有田

雨中望靈山呈明遠

騎曹公事日紛紛  
苟令香爐欲罷薰  
冷雨定知還作雪

好山無奈只藏雲看花便覺名何用勸酒誰能耳不聞  
歲晚官倉塵滿眼只應清坐獨輸君

陪曾吉甫遊中山

去天尺五城南寺自極層軒得此遊山濶雨收雲點綴  
江清日淡柳風流僧扉繚繞牛鳴地樓閣參差斗大州  
公自蓬萊舊仙伯一麾真復占鼇頭

勸耕至赤松山

謬誤君恩再領州名山猶幸復春遊苦無羽客追元放

尚有羣兒識細侯  
麥穗雨晴迷野岸  
桃花風急滿溪流  
隔林布穀如相應  
更酌丹泉為少留

自天封登華頂  
將自桐柏以歸土  
人謂之望海尖  
連天松影轉崔嵬  
夾道桃花迤邐開  
便覺胸中有東海  
不知腳底是三台  
閒雲自作千峰雨  
流水真成萬壑雷  
喚起吹笙王子晉  
夜深乘月上瓊臺

望卞山懷石林翁

卞山苔水共蒼蒼  
中有先生萬石堂  
早歲英名類終賈

暮年眉壽到劉楊人琴遂欲成千載雞酒猶能酌一觴  
身後遺編尚塵積豐碑誰復付中郎

遊鹿田寺

路轉崔嵬第一峰兩仙迎我度空濛不知屢躡青霄上  
但覺身行紺霧中隴麥正隨高下綠山花猶作淺深紅  
極知靈運真任守蠟屐穿林興未窮

同葉夢錫趙德莊遊牛首山

不辭扶病觸春寒及此新晴一日閒雲外經年見雙闕

馬頭乘興數前山清泉細酌巖上佛窟同探紫翠間  
我亦無心詰禪悅銜花百鳥自飛還

寶林院次韓廷玉韻

山繞孤城水拍空惜無殘月照疎桐江干雲斷夜來雨  
木末涼生秋到風六代興亡知寺古老禪神異載碑豐  
詩成極目蒼茫裏惜別情懷醉夢中

會稽道中有感

凋紅亂紫正芳菲寒食青門客自歸江上酒醒聞燕語

日斜睡足看花飛功名老去真何在丘壑平生豈願違  
尚喜繫船探禹穴稽山雲淡雨霏霏

九華道中

行人腳底不生塵絕壁仙凡路已分一水奔騰崖覆雪  
九峯羅立岫填雲謫仙才大三千首國老謀深十萬軍  
莫對青山歎華髮丹砂未就又論文

至日建德道中

聖皇初欽帝中壇羽檄交馳玉仗寒佳節又看當警急

勞生底用較悲懽腐儒憂國成千慮強敵窺人詎一端  
夢想淮南風雪裏可無消息報平安

葉丞相最高亭

丞相園林景物繁花亭那更得躋攀平看溪上千尋木  
不數城南萬疊山歌舞恍如銀漢外笑談常在碧雲間  
醉酣欲問劉公客百尺樓中亦汗顏

賞心亭

亭後世傳  
張麗華墓

北風吹雨冷如秋更上江干百尺樓瓊樹佳人開黃壤

石城華屋變滄洲三峯已覺蓬萊近二水真成汗漫遊  
六代風光幾人物不妨擁鼻向南州

重建極目亭

曲闌十里畫屏開氣壓凌歛百仞臺不盡溪光空外見  
無窮山色望中來旋規北檻裁新竹更闢東牕對野梅  
老子興來真不淺清秋忍負十分杯

次韻張子儀倉司展翠亭

官事常忙心自閒故應拄笏為西山舉頭但覺來風月

著足何妨涉闊闊振廩功成聊共醉追鋒詔下合俱還  
陳天與為守和篇有即闢祀瓊之句二公皆即召用矣須知蒼翠看無盡輸我巖

居畫掩闥

晚登凌風亭戲作

咄咄真成了事癡功名何在鬢霜垂清談安得如夷甫

佳句無勞發愷之山色倚江秋更好烟光連市晚偏宜

田園底許歸能決且揷黃花付酒卮

王夷甫清談終日縣務亦理口未嘗

言錢顧愷之見張融海賦云但恨不道鹽耳因增熬波之句二事皆所困者因以自哂

再至凌風亭

目盡西山落照邊危亭風景故依然重來身忝二千石  
老去心驚十九年種柳已高丹檻外栽花猶占綠牕前  
不堪素髮紛垂領還愧青春令尹賢

題長春亭

一徑清深不起塵芳菲紅紫意隨人應知地勝無非景  
但有花開即是春萱草自隨蘭葉茂棠花還與桂枝新  
綵衣兄弟人生樂莫惜支筇步武頻

題蒼筤亭

手種蒼筤數百竿  
築亭相與枕書看  
故知落落非春事  
直有青青共歲寒  
一壑自欣幽意足  
三年獨得此君歡  
蕭然風露千尋影  
搔首哦詩獨凭欄

采箬亭

山繚重城水拍堤  
雨晴秋浦靜相宜  
新篁弄日千竿玉  
紋簾披風八尺漪  
坐對芳洲端自樂  
興來小艇亦頻移  
他年穩侍蓬萊殿  
聊記高亭一笑時

畫寒亭

月裏瓊宮不奈寒誰令白晝墮人間  
陰風淅淅來深谷晴雪霏霏濺兩山  
靜愛飛流聊洗耳坐看絕磴可怡顏  
紅塵熱客那知此赤腳青松意自閒

凌歛臺

山到西江勢郤回倚山樓殿更高臺天容水色望中見  
帆影車塵空際來桑柘棲分千里迴波濤壁立兩峯開  
登臨擬問興亡事白塔亭亭鎖翠苔

蓬瀛臺

雨餘天宇澹澄瀛及此秋郊一日晴軒蓋翩翩度林影  
笙簫隱隱雜溪聲風隨廣席歌呼轉雲滿高臺步武生  
記取今年作重九丹崖絕壑是神清

錢伯同新創明暉閣

使君談笑兩橋成人向晴虹鏡裏行更闢軒牕待遊覽  
要看山水倍澄明波寬千頃知魚樂歲熟千家響碓聲  
收拾風光付華月一樽還記昔文清閣名用曾  
文清詩語

題金元鼎至樂堂

百歲休論七十稀，羨君林壞得熙怡。  
賦歸已久同元亮，至樂真能慕啓期。  
一壑過人聊自足，萬鍾於我亦何思。  
故應不羨紂朱貴。元鼎辭  
辟得祠帶索行歌世未知

題十二兄野堂

少年行樂記鄉關，月渚霞洲一夢間。  
為愛軒牕臨野水，只疑風景是家山。  
荷香柳影情偏厚，竹色松聲意自閒。  
堪笑主翁持節手，卻來垂釣傍蒼灣。明月渚落霞  
洲許昌湖也

韓子師讀書堂置酒見留

酴醿插架未成陰水滿方塘數尺深入戶幽花真有意  
拂簷高竹更關心鳴禽喚客知閒景舞鶴迎人作好音  
莫道相逢欠歌管一觴酒盡讀書林

山橋

倚杖溪橋暮雨垂春寒空翠著人衣凌空怪石如旗豎  
噴壑清泉作練飛乘興正須隨地飲醉狂聊共插花歸  
從教拍手兒童笑要是山深客到稀

范良臣見過云有食粥之憂以斛米助之因得長

句

抹饑豈復衛文子闕食尚憐顏魯公定知啜粥可餬口

未至腹疾號山芎東方千牘羨飽死顏氏一瓢嗟屢空

我家無錢但斛粟與子共坐詩能窮

世傳兩貧士為鄰其一有餽之斗粟

者抖篋篋中僅得數錢以勞其持餽至夜鄰士叩門假一二錢市油誦書則嘆謝曰盡之矣既而餽甚曰尚有

斛斗可分子也故用為戲

伏日諸君小集沈明遠以小疾不預作詩戲之

廣文官冷酒錢空平日清樽一笑同苦憶車公來座上  
翻成王老隱牆東定中示病應非病詩裏能窮有底窮  
涼月滿天新雨足試憑檄語愈頭風

聞吳端朝作真率集

他年曾作社中人骯髒歸來白髮新閑別常思共杯酌  
舊交那得更比鄰黃雞白酒可勞勸青筍烏椑未絕貧  
恨不從君語終夕空齋愁坐獨傷神

令防得女招飲以病不往走筆戲之

平生諸女重吾貧，敢意君家亦效顰醜。惡未妨攘盜賊，長成難議卜比鄰。予與令附昆仲鄰居比皆得女遙憐四十稱郎罷，豈

惜千金辦主人。美酒尚須留待我，明年應見玉麒麟。

次韻陳子象謝新火詩

曲水流觴迹易陳，水邊那復御厨珍。茶烟永日看輕颺，槐火今年又一新。鄰舍未應煩束緼，官庖猶幸有輿薪。須公更試長擎夜，賸照歌臺拂鏡塵。

李彭元擣會吉甫詩卷數帖見過

十年松竹暗茶山君有詩聲舊將壇食齋誰如東野苦  
無覩不奈廣文寒閉門久詠高軒過彈鋏今嗟行路難  
我亦凋零舊賓客遺編聊共拂塵看

李子永惠道中詩卷

踏雪衝寒徧幾州豈妨乘興作清遊風橫白鶯歌瓊樹  
月滿青山問釣舟夢繞征途渾厯厯老諳世事總悠悠  
塵埃鞅掌君休恨自有詩輕萬戶侯

熊子復惠十詩作長句謝之

白首相期輸墨中  
衰齡況是甲庚同  
久懷妙論傳犀麈  
尚喜清詩附驛筒  
柳長五株知訟少  
麥呈兩穗報年豐  
去天一握歸來近  
密令疇庸可拜公

姜特立寄近詩

雙溪巖曲蘆江岸  
每見君詩句益奇  
漸喜青雲今得路  
豈妨白雪尚摛詞  
斷蛟入海功何壯  
披腹排雲世共知  
研郤月中丹桂手  
朝陽應占鳳凰枝

姜五中鄉薦  
今為春坊

周航定國攜諸公所贈詩求次韻

拾青紫本一經明得失由來信可驚美玉固應人未識

千鈞何自俗能輕馬曹寂寞心空在驥子昂藏骨更清

航有子  
預薦穩步烟霄遲速耳筆端夢覺已花生

李元衡寄示三池戲藁

文彩風流冠一時三池聊作鳳凰池新詩到處傳桐葉  
麗唱他年滿竹枝歸夢故應懷古括清談還喜對峨眉  
玉堂待草山東詔解纜春江莫放遲

會丰惠文編

薄領裝懷筆擁塵經年舌強不論文斐然步武心還喜  
籍甚聲華耳舊聞曲水賦詩須鮑謝甘泉第頌憶淵雲  
相期穩上芸香閣要策清時輪墨勲

徐應祺惠文編

渴雨空齋晝不眠疎簾竹簟意翛然借君妙語清袢暑  
起我哀悰似壯年得意每看雄霓句逢時會奏白雲篇  
漢庭久重春秋學凌厲烟霄更著鞭

寄懷子雲兄

長年游宦已堪嗟  
寓舍無田豈是家  
母子分飛還歲換  
弟兄相望各天涯  
塵埃閱世丹心在  
朱墨繁人兩鬢華  
聞道過庭新哭鯉  
開書空有淚橫斜

赴信幕寄子雲叔  
曉及同寺

田園未辨各身謀  
兄弟今成迭去留  
游宦三年方啓足  
寄書千字又從頭  
家書以千字文為號  
白雲不定山容晚  
碧水無窮樹色秋  
回首寺橋同社客  
想因明月話離愁

謝三船上醉同歸  
黃四花邊手屢攜  
巷裏何曾異南北

屋頭還復記東西一杯相屬情猶在千里分飛意自迷  
堂下秋來足萱草定傾家釀飲黃雞

初至上饒寄子雲

險阻艱難客路賒東西南北問生涯秋聲瑟縮生梧葉  
野景蕭疏上菊花去國已驚身老大無家空有淚橫斜  
遙知載酒齊山寺應憶年時醉月華

寄梁士衡

癸酉作

江上潮聲日夜來相望蹤跡共塵埃亂花洗雨紅成陣

疊嶂連天翠作堆山市放歌知屢醉沙津獨步想千回

松林月出溪橋夜猶憶當年對野梅

夜坐有感寄子雲

金陵  
作漕

風景新亭舊往還誰能舉目較河山宦情老去秋多感  
官事忙時夜始閒牕外槁梧風瑟縮竹間亂石雨淙潺  
青燈已作江湖夢同約歸期早晚間

過龐祐甫

半畝方園水到門地偏人靜恰如村聲名不用卿王衍

文字真能僕屈原舉世知君如我少平生學道欲誰論  
何時共結柴桑社籬下秋來菊正繁

劉子淵監廟年八十六耳目聰明能飲酒舉大白  
喜賦詩比過之因示長句次其韻

才疏政拙愧能名黃髮猶欣見老成林壞固知聊自樂  
門間要是已堪旌持盃漱灑千眉聳落筆縱橫四座驚  
笳鼓過君應一笑平田兩部足蛙聲

過趙仲鎮

山下清溪溪上亭竹陰芳徑眼增明已知數日逢寒食  
賸喜今朝作好晴酒美故應客醉歌長不自覺詩成  
春深準擬多行樂卻作花前送我行

秋雨新霽過趙慎中留飲

門外黃塵有底忙主人高臥興何長春風竹樹簫笙轉  
雨足軒牕笑語涼耳熱漫思官裏事眼明猶識醉時粧  
紫雲莫厭頻來客未抵當年御史狂

陸務觀赴闕經從留飲

溪岸風高霜作稜杯盤草草對青燈已甘鹽菜待梁柳  
況有酒漿延杜陵歲晚鬢毛紛似雪天寒門巷冷于冰  
春風穩送金闕步看躡鰲山最上層

寄徐滁州淳立

青瑣金鸞跡未容寘公猶在昔賢中著書定已追迂叟  
聞編通鑑後事甚備得郡何妨號醉翁豐樂橋邊魚動鏡清流闊  
下馬嘶風獨憐溝輩猶奔走不得登臨一笑同

寄別子雲

江干風雪敝貂裘兄弟相看已白頭兩月追隨無十日  
一春離別甚三秋清時官職難頻竊異縣田園合早求  
並戲毋前端有日省郎雖美不如州

次韻沈駒甫留別

筆下縱橫自學林胸中玉海更清深識君異縣見眉宇  
過我空山聆足音月近中秋還惜別雪飛窮臘會重臨  
閉門剝啄誰相問與客寧論舊與今

別范元卿

晴林綠樹越江邊聊泊東來倦客船風引花香微近酒  
水浮月色澹連天驚心朋舊皆千里回首光陰又五年  
莫笑相逢便離別此生身計已飄然

松江別范至能朱伯陽

彈鋏功名易白頭歸歟未辨五湖舟送君與我皆為守  
到處逢山且縱遊薄日連雲千嶂曉斜風吹雨一江秋  
買魚斫鱠垂虹上更為今年好景留

吳歛灣月韻江船屈指同行二十年勝日五湖看老矣

倦游雙鬢各蒼然擬尋詩酒平生社未了塵埃薄宦緣  
後夜西風相憶夢琵琶亭下水籠烟

留別傅安道

華髮相看四十年飽諳世事欲忘言一春離別當寒食  
再歲追隨作上元湖外溪山明小檻雨餘花柳暗西園  
極知老大交朋少相與論文更一樽

場屋俱為拜賜師烟霄獨喜鳳毛飛壯心似鐵何曾老  
健筆如椽合一揮北渚青山勞我夢西垣紅藥待君歸

詔環不作經時隔沙路薰風卷繡衣

南澗甲乙稿卷四

欽定四庫全書

南澗甲乙稿卷五

宋 韓元吉 撰

七言律詩

送湯丞相帥會稽

淮岸春來罷夕烽  
君王奏凱大明宮  
守闕豈但勤蕭相  
分陝猶宜屈名公  
綵綬不妨龍袞貴  
錦衣真與故鄉同  
政成更上平戎畧  
歸作麒麟第一功

翰墨英名多士先經綸長策萬方傳久知燕許文章大  
要自臯夔事業賢曲水蘭亭修竹外都門祖帳百花前  
去天尺五調元舊肯使邦人借一年

疇昔追風幸執鞭詞場好在筆如椽十年晞驥猶瞠若  
晚歲登龍未偶然下客陽春驚白雪何人綠水近紅蓮  
尚應九里蒙河潤他日一天今二天

送周承勛赴荆南幕

周南留滯幾年餘筆力追還兩漢初無地寘君羣玉府

因人貽我萬金書未嗟王粲依油幕聊喜安仁奉板輿  
夢想風帆轉平楚眼明江樹綠扶疏

送馬莊甫攝幕鄱陽用趙文鼎韻

杖策衝寒不作難弓刀結束笑談間便從幕府清民訟  
已作戎車靖蠻蠻風雪幸無千里路江湖纔隔數重山  
荆南桃李新開徑屈指春融及早還

送陳天與知徽州

臺閣英名二十年卜居那得便林泉履聲舊振星辰上

諫墨猶存雨露邊欲考治功三府近且施惠政一州先  
黃山看盡須黃閣六月天池更著鞭

送陸務觀得倅鎮江還越

高文不試紫雲樓猶得聲名動九州金馬漸登難避世  
蓬萊已近卻迴舟燒城赤口知何事許國丹心惜未酬  
歸卧鏡湖聊洗眼雨餘萬壑正爭流

前年邊馬飲江水烽火瓜州一水間正使樓船多戰士  
要須京峴作重關平戎得路可橫槊佐郡經時應賜環

把酒賦詩甘露寺眼中那更有金山

送陸務觀福建提倉

觥船相對百分空  
京口追隨一夢中  
落紙雲烟君似舊  
盈巾霜雪我成翁  
春來茗葉還爭白  
臘近梅梢儘破紅  
領畧溪山須妙語  
少迂使節上凌風

僕為建安宰  
作凌風亭

送呂令防赴海門宰

五斗由來豈療貧  
尚應拄笏對秋雲  
未嗟薄宦來還去  
但覺頻年我送君  
舍北水生思共賞  
淮南米賤好相聞

白魚青筍平生事愁絕江寒鴈影分

野閣山扉舊卜隣竹陰花徑每情親舉觴契闊又千里  
同社淒涼無幾人濯濯未妨如月柳悠悠真不奈風塵  
海門應去蓬萊近我欲乘桴試問津

送趙蕃辰州司理

甫字昌

故家零落眼中稀歲月峥嵘踏路歧詩解窮人君莫恨  
錢能使鬼我方知片言折獄非無日談笑封侯會有時  
一上梅山弔槨瓠臘題佳句寫幽思

送張幾仲知泰州

紫橐甘泉不願留虎符聊試海邊州長城底用騎園鐵  
下瀨直須船有樓草木已應知世望江山好在得詩流  
春風桃李西溪路宣室歸來尚黑頭

送施徽州二首

御史英名世罕傳峩峨冠聊復漸承流治功要自先馮翊

大惠何妨始歙州野嫗定知還去虎山民從此罷賚牛

二事見唐劉蕡崔元亨仕歙州刺史  
百年善政須公繼尺一書頌願少留

江出新安見底清黃山高勢碧崕嶧袴襦會遣民皆有  
枹鼓懸應夜不鳴蠟屐未須懷別墅虎符今喜得名城  
他時一榻容徐稚端共輿人樂政成

送李子永赴調改秩

晚驥鳶騰十二閑追風那復駐轍間向來官况誠留滯  
此去詩情記往還會課未妨更美秩趣班聊喜近天顏  
荆鷄莫費千牛办奏賦金門入道山

送王德和赴調改秩

樽酒盤蔬語夜闌。三年猶得幾追歡。  
海棠半折春方好。楊柳都青社正寒。  
籌畫定應瞻武帳。文華端合待金鑾。  
割鷄底用磨天刃。遲日湖山滿意看。

送葉夢錫赴荆南

南郡開邊古上流。君王側席用嘉謀。  
壯懷何止入雲夢。雄畧行看半九州。  
風勁鼓聲連岸動。雪晴江影與天浮。  
一樽莫作新亭語。勲業歸庸尚黑頭。

送韓子師守婺州

功名相望十年前白首官曹僅接蹠良玉要須更九火  
明珠那得閼重泉清風遂作雙溪詠老手懸知劇郡便  
奏課不妨聊第一歸來更著祖生鞭

送沈千里教授邵陽

縠紋江畔得君詩俊逸清新字字竒一笑偶成歸妹約  
幾年還見外孫辭橫經絳帳地雖遠給劄金門天未遲  
痛飲離騷吾事爾湘山風物與春期

送潘元夙教授欽州

字子春

文筆超然自不羣胸中韜畧未全陳詎應遠致嶺南士  
會見來清塞北塵桂海接天聊縱目火雲堆露正關身

元戎在昔同科彥一鶚飛書上紫宸

桂帥王舍人  
亦中丙科

送澤赴新塗尉

少年薄宦幾東西送汝臨歧意尚迷作尉未嗟官職小  
致身當與古人齊短蓬載雪看梅蕊古驛衝風信馬蹄  
爾父漸衰吾已老寄書時一到南溪

送李直剛鹽官縣尉

蚤接君家大父遊乃翁幕府尚淹留文華遂見諸郎秀  
名宦懸知異日優朝雨拍溪梅正熟晴雲烘路麥初秋  
渭南自昔多賢尉官近長安不用愁

送元修歸廣東

十年門戶苦彫零屈指天涯幾弟兄羈旅可堪懷世事  
典型誰與振家聲驚心朔岸秋風急極目南溟瘴霧橫  
好過貪泉未應酌少年遊宦要冰清

官曹邂逅得情親一賦松齋遂絕塵天祿校書元有路

甘泉第頌可無人江山興味不知老芋栗生涯未覺貧  
我欲邀君寺南住春風聊與杏花鄰

送孟壻植還臨川

西風同泛婺江船倒指光陰六換年秋色又看梧葉老  
離懷還對菊花前塵埃左宦空搔首功業青雲更着鞭  
兒女闡情易來往一樽臨路亦淒然

送郭誠思歸華下

忘懷物外且如愚何事勞精據槁梧以馬喻馬即非馬

數輿無輿方得輿莫執斧斤過櫟社懶施几席向蘧廬  
好歸玉秀峯前座閑看晴雲自卷舒

依韻和御製秋晚曲宴詩

巍巍舜治浹嘉生宴俎豐年萬寶成禁幄雲深開曉色  
上林風迥起秋聲威加鼉鼓雷霆轉喜動龍旂日月明  
應手神珠看電掣旋頭消盡鐵山平

次韻子雲春日

林壤欣欣樂有餘杖藜常及曉鶯初春風入戶花開落

晴日當牕雲卷舒契闊經年千里面平安滿眼數行書  
弟兄州縣真勞爾疇昔交遊半石渠

問舍求田苦未成定逢丘壑眼先明極知官事無時了  
且作青山任意行元亮折腰應自笑子荆洗耳詎忘情  
不妨同是催科拙下考他年更類城

次韻子雲途中見寄

輕風獵獵轉殘紅春去荒村暮雨中花影帶寒猶點淡  
山光和霧更空濛百年拚卻身長醉五斗由來計日窮

慚愧賓朋有膠漆不堪兄弟苦西東

十年計拙未能伸四海滔滔總是津但得有山供醉眼  
不憂無地著寒身鶯花撩亂空三月風雨淒涼過幾旬  
莫道衡陽無鴈信故應時有北來人

次韻子雲盱眙道中三首

海上狼烽不起烟兵戈猶記舊年前巖居有客能招飲  
肉食何人為給鮮但得生涯類盤谷可無風景似斜川  
共尋餉口田三畝仍辨遮頭屋數椽

江南淮北市初通人語忻忻作好風抱耒只思耕龍底  
買船誰復渡遼東向來熊耳真投甲此去天山擬挂弓  
上策聖君今自治白頭憂國寸心同

桑間無褐半饑人斗粟千金不換銀末路多慚道溝壑  
長年敢笑走塵埃江聲直下黃牛峽河勢遙分白馬津  
回首向來征戰地壯懷俱在只傷神

答金元鼎喜雨

幾日雲陰合又開良田秋近起黃埃一觴未致靈祠禱

半夜先欣好雨來  
政拙自知容我懶  
詩清要是得君催  
不妨咳唾皆珠玉  
漸喜新涼入酒杯

再次韻

雨後紅蕖滿意開  
風前綠淨絕纖埃  
獨憐病守孤吟賞  
猶幸詩翁數往來  
農事已知溝澗足  
歡聲不待管絃催  
旋舂玉粒添冰釀  
莫負樽前鸚鵡杯

次韻趙文鼎雨中

老病幽栖不厭閒  
未須消息夢長安  
一春意淡連牆竹

終日清香小檻蘭紅蕊便驚風裏盡青林猶慙雨中看  
故人詩卷從頭讀似酌芳樽為解顏

次韻中甫兄九日同集張園

湖山秋盡作幽期未覺浮舟齒昔衰怯酒自憐多病後  
強歌還憶少年時平蕪半綠烟猶接好菊微黃雨更宜  
單父層臺在何許一樽懷古少陵詩

雪中走筆寄鄧延碩

去年雪裏共清遊蕭子酣歌幾唱酬竹葉又看新釀熟

梅花還作暗香浮青衫尚想君奔走短褐空嗟我滯留  
南北兩峯銀色界不應孤負水邊樓

和同僚賀雪應祈

臘近春臨雪意遲褰衣敢憚走靈祠夜聽小雨猶傾耳  
曉看羣山頓展眉好句懸知得冰柱香醪試為壓羔兒  
便應風月臺中客不減梁園賦就時

次韻韓子師雪中二首

九門疊壁耀朝暾不比千燈作上元天與蕊珠開漢殿

人將冰玉奉堯樽  
寒威已覺邊聲靜  
春意都隨詔語溫  
夜入蔡州飛將在  
肯容敵騎妄稱尊

曲欄高檻倚崔嵬  
要是仙京白玉臺  
雲色自連鶼鷀動  
天顏亦為近臣開  
光翻午夜渾疑月  
花滿新春未數梅  
自笑詩成無好語  
但知縞帶與銀杯

次韻黃文剛秀才雪中見詣且惠新柑

填空密雪借風威  
深閑蓬牕畫掩扉  
待學仙人乘鶴駕  
未容寒士泣牛衣  
連篇妙語千金重  
滿合黃柑數寸圍

細酌清樽酬夜月更看庭樹作花飛

次韻梁子張雪中約遊湖上不至

東風閣雨釀重雲勝喜天街玉作塵梅已著花還點綴  
柳能吹絮便爭新湖光坐偏宜晚酒力散欄別是春  
慚愧相如果能至卻將冰柱語驚人

次韻子雲歸興

湖海周遊未卜居好山時一夢衡廬苦無事業堪調鼎  
薄有生涯可負鋤玩世阮公方蠟屐歸田陶令亦巾車

屋頭早晚東西住愁絕江船夜雨餘

次韻曾吉甫題畫屏風

何許江山發興長潭疑廬阜對彭郎胸中丘壑元蕭爽  
筆下煙波故渺茫落落疎松長映座冥冥飛雨欲侵牀  
冷然已作華胥夢便有羣仙到枕旁

次韻王季夷時同宿蔣山

亭亭石塔寶公龕勝喜僧牀得對談堪凜詞場君亦滯  
驅馳世路我何堪軍書又見紛南北敵勢由來說二三

淮岸西風晚更急似傳烽火過江南

次韻沈千里玉山道中見寄

霜晴懷玉自生煙寒色淒淒過鴈邊路轉湘南知幾日  
山連楚尾又窮年相期鶩黍情歡甚惜別塵埃意黯然  
馬上哦詩衝暮雪清風懷我北牕眠

次韻沆姪

平生作計本山林便腹空餘貯古今致主未忘他日志  
歸耕每動十年心疎銅浪喜煙霄近弱植多慚雨露深

早決儒科猶望汝跫然虛谷佇聞音

次韻李子永見慶新居

旋移桐樹占高岡更喜松筠翠作行簷外參差見林影  
門前溶漾足溪光天涯留落還相識地上經營豈太忙  
好事肯來三徑在已添蘿菊待重陽

次韻沈駒甫觀石井

湖裏駕鵝亦洞天最奇山下石坳泉一泓自覺寒光淨  
六月都無暑氣煎清似錫峯藏雨露迥如篁嶺閟風煙

壁端舊乏騷人句從此須君妙墨傳

次韻王亞之來過橫碧

君到層軒眼爲寬諸峯還得雨中看嵐光座蒼翠出寺影拂波金碧寒詩興豈妨隨望極秋聲不奈起愁端相逢莫怪無樽酒秀色崔嵬尚可餐

次韻宋傳道夜雨聞捷

松庭竹戶野僧家獨坐荒齋到日斜門外江風寒作雨城頭戍鼓夜啼鴉對牀更欲論心事擁褐還驚逼歲華

卻憶巴山舊時語  
夢回牕燭已生花

邊地山川自漢家  
遙旗圖畫拂雲斜  
江干戰騎膺如虎  
塞上神兵斧似鴉  
羽檄故應煩號令  
星車底用賦皇華  
軍聲指日騰三捷  
陣勢他年本六花

再用前韻戲傳道

空谷天寒翠袖遮  
無人曾見玉釵斜  
詩成落日千尋竹  
歌就殘陽萬點鴉  
妝額淺深知內樣  
舞衣裁剪勝京華  
自憐已作高唐夢  
須信餓腸眼易花

次韻趙仲績久雨夜坐有感二首

春雲黯黯未成晴落盡湘桃見紫荆薄官馳驅雙鬢改  
流年荏苒寸心驚幽花映水淺深色啼鳥穿林高下聲  
幾許風光欠行樂夜寒和雨聽殘更

十日風斜雨更橫一春能得幾新晴便須蠟屐穿花去  
莫惜障泥傍水行酒興未妨隨處發詩狂勝判隔年程  
醉來乞得西山藥鬚髯雲間吹鳳笙

次韻張晉彥書事

舉世諸兄事孔方平生學易問歸藏漸欣過客知吾懶  
未怪小兒如我長鶴怨猿驚成底事烏跋兔蹶自奔忙  
便須耳熟追行樂更疑心齋得坐忘

次韻吳明可與史致道會飲牛渚

月出千山捲暮雲遙知玉節會江濱便應擊楫酬今日  
不用然犀歎昔人煙外笛聲誰送晚水邊花影自迎春  
風流三百年無此况有清詩句法新

次韻徐應祺小樓

漱漱清波泊路衢垂垂高柳對扶疎已知百尺樓堪卧  
况有三重茅可居我老詎能賡鮑謝君才端合紹嚴徐  
直須座上千鍾酒澆起胸中萬卷書

次韻答沈明遠

如君絕足向風塵顧我宜為途路人阿買八分時自笑  
阮瞻三語詎能新狂談尚欲嘲風伯妙筆真堪賦洛神  
得酒相尋那厭數醉歸官長未應嗔

亞之出示其祖岐公墨迹及惠崇小景且和前韻

復次答之

壁上春江萬項寬  
錦囊遺墨幸重看  
功名世路真多畏  
貧賤交盟敢自寒  
新有詩聲見候喜  
盡攢懷抱得蘇端極  
知鼎食君家舊未厭  
堆盤首蓿餐

新晴梅花可愛欲招明遠少稷凍醪未熟  
癡兒了事不能閒猶喜驥人共往還  
歲晚真成廢書史  
雪晴那得負江山多情春與梅花厚一醉天于我輩惺  
謄作新詩催酒熟曲池冰斷水潺潺

紅梅

不隨羣艷競年芳獨自施朱對雪霜  
越女漫夸天下白壽陽還作醉時粧  
半依修竹餘真態錯認夭桃有暗香  
月底瑤臺清夢到霓裳新換舞衣長

陸子逸惠桃花戲贈

故人招我千山裏也有仙葩巧送春麝馥染衣金縷重  
酒紅生粉玉肌勻洛城景物知誰紀寒食風光觸處新  
莫把天香調行客曉粧留與綠牕人

次韻陳子象十月惠牡丹

芙蓉掃地菊花陳國色天香一夜春愛景自催芳意動

清霜不礙曉粧新長生便可書仙籍上瑞端宜首貢珍

是日會慶節宗孝  
宋生辰名會慶節詩就只應開頃刻先生筆力起千鈞

用前韻以小春茶餉子象

仙花不用惱詩人亦有靈芽特地春數朵嬌花真綽約  
一甌釅白更清新眼明共識西都豔齒冷應懷北苑珍  
佳茗竒葩堪並賞須公品第入陶鈞

次韻余寺正瑞香花

香爐峰下異香風，長憶幽芳夢寐通。  
渴雨旋傾茶作椀，護霜新織翠成籠。  
丹青點綴瓊瑤上，蘭麝飛浮錦繡中。  
花品躋來誰第一，似接玉葉間輕紅。

故致政宣義葉公挽詞

葉山父

植德由來不自知，成家今見寧馨兒。  
名駒有種能千里，仙桂騰芳定五枝。  
公有三子二孫，綵綬螭坳方致養，素車雲路忽興悲。死生了了真餘事，流水斷烟空好詩。

挽王僑卿右司詞

壯年嘉譽藹瀛州袞袞諸公並僕游獻納未持天上橐  
光華頻總嶠南州牢盆賸算波熬素蒲澤終期劍買牛  
世路榮枯真莫問浮雲山渺淚橫秋

挽汪南美大夫詞

年如衛武尚安強名似康成善一鄉三邑久知歌惠愛  
西州何幸著循良真清在昔傳家世治狀由來藉廟堂  
千載蔣山分未朽芝蘭玉樹藹餘芳

挽知泰州宋公大夫詞

投老溪南幸卜鄰一麾頻見寵章新  
養花別圃成三徑

種木佳城度十春

公自營壽歲甚久

前席遂孤明主意

公入對天語甚

瓦留鞭難繼澧陽塵空餘樽酒追隨地同社淒涼淚滿巾

挽故鈐轄趙公序遠詞

子直父

平昔長材未一施尚餘嘉譽藹天支事親養志人爭仰  
教子成名世共推盛德故應傳後裔清規誰為勒豐碑

華林岡下寒泉水隱隱雷聲紀孝思

母夫人吳雷他日  
序達聞雷輒涕灑下

楊待制挽詞

妙齡著足道家山壯歲升華玉筭班千里麾符纔假手  
幾年香火竟投閒詩書坐使家聲大簪綬誰令壽歷堅  
太傅功名有遺恨鶴雛凋落淚頻潸

周彥廣待制挽詞

淮海歡騰五袞歌政聲京兆益中和鄰侯井在功堪紀  
鄭國渠成利更多紫禁邇躋知異眷珍臺歸卧本微疴

功名方展凌雲步奈此佳城白日何

故運使直閣少卿劉公挽詞

子履

清時得路每投閒垂上甘泉玉筍班借箸幾看趨魏闕  
請纓常欲度天山放懷俠氣干夫上抵掌高談一夢間  
使節塵生人共惜朔風吹淚太湖灣

故致政敷文少卿魯公挽詞

左學摛文藹雋聲青雲接武二難兄主知自紀宜三院  
使節更持僅九卿庭下芝蘭方競秀舍南桃李已成陰

掛冠不待甘泉橐愁絕高門淚滿纓

故致政提刑少卿方公挽詞

籌策霑榮譽最賢青雲回步接英驟請纓莫遂終軍志  
投綏方期衛武年原隰觀風頻玉節省臺聨秩近甘泉  
一舟五鶴符佳夢波水成湖問葛仙

挽主奉路分趙公詞

文肅公

畫舸安輿雪水清春風猶憶送君行無家舉案人方恨  
有子分符世共榮德履未容居祭酒聲華端合主宗盟

太支耆老凋零甚蘭玉階庭獨擅名

故提點判院魏公挽詞

公濟

當年卓魯盛材猷循吏聲名始一州功在龍津看雨施  
風行金穴見錢流襄庸合上清華貢奏課俄驚疾病留  
巍巍諸郎富儒雅益棺十世可無愁

劉子宣侍郎挽詞

妙齡嘉譽滿江東晚接甘泉豹尾中烜赫身榮知有道  
從容心計不言功威行峴首追羊叔名在鄧江憶魯公

種木十年歸莫遂塗車千里恨何窮

李壽翁侍郎挽詞

同解銓衡並把麾五年相望楚江渭鄰牆會面嘗談易  
更選偷閒更說詩北客遭逢人共歎公陸辭日上有北人難得之論南

州流轉事難知投簪自有江湖志雲白天青淚滿頤公居

終作詩有白  
雲青天之句

挽周仲深郎中詞

才力軒軒動漢庭清時指日致功名一同在昔歌遺愛

兩郡于今有治聲使節暫分秦望重郎星初近太微明  
死生契闊空泉壤轉典殊恩世亦榮

王中奉漢老挽詞

符節光華二十春壯猷曾不倚嚴宸棲心香火纔同社  
放意溪山幸卜鄰再世簪纓宜袞袞一門蘭玉尚詵詵  
霜清三浴追隨地丹旐飄然淚滿巾

呂伯恭挽詞

青雲塗路本青虧聖願相期四十年臺閣久嗟君卧疾

山林空嘆我華顛傷心二女同新穴拭目諸生續舊編  
斗酒無因相沃醉朔風東望涕潸然

周濟美挽詞

迺翁持橐舊知名兩郡分符見典型禁闈方應馳偶步  
中臺俄忽墮修翎故人零落風前葉北客漂流雨後萍  
白馬素車三巷路淚兼臘雪灑林坰

暉仲叔挽詞

材業光華藹薦紳由來孝子出忠臣

七十叔祖世稱孝子載桐蔭舊話

五年字邑祇明詔兩路觀風惠遠民徐弭湖邊纔卜築  
葛翁山下忽棲神朔雲千里人揮淚遺命歸從大母鄰

五言排律

次韻唐與正喜雪二十韻

窮臘逢三白山城兩換年破寒初澌渥作態正翩翩倚  
杖心逾喜搔頭意自便直疑填巨壑豈惜沴長川官粉  
慙施白仙禽恨奪鮮銀牀凝露綆玉柱溢風絃徑滿巖  
難認牕虛隙易穿共尋瑤草路俱誦藥珠篇獵騎朝羣

擁漁燈夜獨然凌風幾間苑照日盡藍田勝約佳賓集  
先煩好句傳荷枯疑璧碎柳細訝絲牽有士迷青眼無  
人笑黑肩豐年期不日瑞氣藹非烟竹密還爭舞梅疎  
只鬪妍輕鷗隨浩蕩戲蝶伴聰翩強續麻衣詠真逢縞  
帶賢凋零屬國節片段廣文旣短棹尋安道高樓憶仲  
宣名駒紛照夜無復愛連錢

湯丞相生日二十韻

寶歷千齡會神槎八月流人知挺生傑天欲中興周文

筆超三古聲名溢九州宏才自伊呂餘事豈應劉繫昔  
開黃閣于今尚黑頭裴公旋卧護蕭相暫居留鶴奕稽  
山綬光華綠野遊銀輿壽母貴玉耳上公優嗣聖資爰  
立昌時副聿求來歸嘉季子入觀偉韓侯今日恢王略  
蒼生跂廟謀中原尚紛擾絕塞要懷柔勝算如先定成  
機會可投洪源端欲汎前箸匪無籌日月符羲馭乾坤  
協禹疇行看靜蛇豕俱議息貔貅考有中書第官無太  
尉酬兩京期迅掃九廟得重修祉福天方錫勲庸世未

休斯民納仁壽公壽幾千秋

投贈徐平江三十韻

上聖恢方域吳門翊帝京千秋季子國百雉闔閭城屏  
翰資良牧文昌輶貳卿龍墀虛紫橐虎節駐紅旌河潤  
功初洽棠陰政已成農桑歸愷悌絃管樂升平世仰韋  
公譽人高白傅名雲樓凌月府花島爛蓬瀛香霧凝春  
畫橋虹卧曉晴清規三不惑盛事二難并舊俗寧論化  
重臨倍有聲向來宣使指曾是格刑清自觀銅魚拜欣

聞竹馬迎五湖歌吹滿兩郡吏民爭

公嘗按刑浙右而自明移蘇

嚴

助書頻賜蕭卿治欲更還應對宣室俱議直承明鼎席

猶虛位戎亭正息兵安危均注意中外等持衡補袞才

獻壯康時智略宏天津飛驥足雲路逸鵬程疇昔參賓

從頑疎荷鑒評馳驅奉刀筆談笑接簪纓夢結閨陬遠

心驚蹶滌橫寄身侔困鮒盡室道長鯨官牒霑微祿恩

波拯再生膺門憐舊契禡薦及難兄未釋鹽車駕徒懷

瓦釜鳴幾年良自哂一飽定誰營洛下裘空敝新豐酒

獨傾知公行入輔故吏敢言情

少稷家觀雪賦江字三十韻

雪暮來無際長吟坐北牕未嫌光奪月先恐勢填江雲  
色生冰柱風聲倒石矼疎簾纔的燭破屋漸錚鏹始訝  
烏能白旋驚馬盡驪會朝瓊飾弁獵較素綱杠玉帝開  
宮闕瑤姬擁旆幢仰空峰作陣窺徑蝶成雙價重連城  
璞明逾釤壁缸冷烟紛莫辨凍溜不成淙計拙夸遼豕  
塗窮笑越龍戴牛迷象齒覆鹿誤羊羶酪乳浮茶鼎花

鼙鑼鼓控崖枯頻畏住鵠瘦暫脾肛共想周王宴誰虞  
漢使降獻衣知念札加璧殆追逢蹇駟深憂沒籃輿重  
莫杠淹鍾應預賜增斗定先撞短日樓窮巷豐年卜萬  
邦緇塵異羈旅華髮逐耆龐處士欣尋戴參軍豈遇龐  
裘穿心易怯履敗足微跕荷笠間垂釣迴船穩繫椿清  
狂時仄帽泥飲屢空缸酬唱才皆敵歌嘲語或嗟閉門  
嗟懶惰授簡愧愚憲戈戰森磨厲韶鈞富擊揚絮鹽翻  
雅況蘭竹變新腔取醉華燈爛催歸戍鼓鼙晴簷成夜

雨更聽龍頭瀧

南澗甲乙稿卷五